



Тауар таңбалары, қызмет көрсету таңбалары және тауар шығарылған жерлердің атаулары туралы

Мұрағаттық версия

Қазақстан Республикасының Заңы. 1999 жылғы 26 шілде N 456-І

Осы Заң Қазақстан Республикасында тауар таңбаларын, қызмет көрсету таңбаларын және тауар шығарылған жерлердің атауларын тіркеуге, құқықтық қорғауға және пайдалануға байланысты туындайтын қатынастарды реттейді.

1-тарау. Жалпы ережелер

1-бап. Осы Заңда пайдаланылатын негізгі ұғымдар

Осы Заңда мынадай ұғымдар пайдаланылады:

- 1) бюллетень - тауар таңбалары мен тауар шығарылған жерлердің атауларын қорғау мәселелері жөніндегі Қазпатенттің ресми мерзімдік басылымы;
- 2) тауар таңбасының немесе тауар шығарылған жердің атауын пайдалану құқығының иесі - кәсіпкерлік қызметті жүзеге асыратын, осы Заңға сәйкес тауар таңбасына айрықша құқыққа немесе тауар шығарылған жердің атауын пайдалануға айрықша құқыққа ие заңды тұлға немесе жеке тұлға;
- 3) географиялық көрсеткіш - бұл - белгілі бір аумақтан, аймақтан немесе жерден шығарылатын тауарды бірыңғайландыру көрсеткіші;
- 4) өтініш беруші - тауар таңбасын тіркеуге немесе тауар шығарылған жердің атауын тіркеуге және тауар шығарылған жердің атауын пайдалану құқығын беруге өтініш берген заңды немесе жеке тұлға;
- 5) айрықша құқық - тауар таңбасын немесе тауар шығарылған жердің атауын өз қалауы бойынша кез келген тәсілмен пайдалануға оның иесінің мүлктік құқығы;
- 6) тауар таңбасын немесе тауар шығарылған жердің атауын пайдалану - тауар таңбасы немесе тауар шығарылған жердің атауы қорғалатын тауарларда және (немесе) олардың бумасында оларды қолдану, тауар таңбасының немесе тауар шығарылған жердің атауының белгісі бар тауарды жасау, қолдану, әкелу, сақтау, сатуға ұсыну, сату, маңдайшаларда, жарнамада, баспа өнімінде немесе өзге іскерлік құжаттамада қолдану, сондай-ақ оларды азаматтық айналымға өзгеше енгізу;
- 7) ұжымдық тауар таңбасы - бұл заңды тұлғалардың және (немесе) жеке кәсіпкерлердің (бұдан әрі - бірлестік) қауымдастығының (одағының) немесе өзге де бірлестігінің немесе бірыңғай сапалық немесе басқа да сипаттамалары бар олар шығаратын немесе сататын тауарларды (қызметтерді) белгілеу үшін қызмет ететін тауар таңбасы;
- 8) Тауарлар мен қызметтердің халықаралық сыныптамасы - 1957 жылғы 15 маусымда Ницце келісімімен қабылданған, кейіннен өзгерістер мен толықтырулар енгізілген сыныптама;
- 9) тауар шығарылған жердің атауы - бұл ерекше қасиеттері тек қана немесе негізінен оны шығаратын жермен, оның ішінде табиғи жағдайлармен және (немесе) адам факторларымен байланысты тауарды белгілеу үшін пайдаланылатын географиялық көрсеткіш;
- 10) жалпыға бірдей белгілі тауар таңбасы - бұл Қазақстан Республикасы қатысушысы болып табылатын халықаралық келісімдерге орай, мүдделі тұлғалардың

айғақтарына негізделген құзыретті органның немесе соттың шешімімен жалпыға бірдей белгілі танылған тауар таңбасы;

11) патенттік сенімді өкілдер - заңдарға сәйкес Қазпатент алдында жеке және заңды тұлғалардың өкілі болу құқығы берілген азаматтар;

12) тауар таңбасы, қызмет көрсету таңбасы (бұдан әрі - тауар таңбасы) - бұл осы Заңға сәйкес тіркелген немесе Қазақстан Республикасы қатысатын халықаралық шарттарға орай тіркеусіз қорғалатын, бір заңды немесе жеке тұлғаның тауарларын (қызметін) басқа заңды немесе жеке тұлғаның біртектес тауарларынан (қызметінен) ажырату үшін қызмет ететін белгі.

2-бап. Қазақстан Республикасының тауар таңбалары, қызмет көрсету таңбалары және тауар шығарылған жерлердің атаулары туралы заңдары

1. Қазақстан Республикасының тауар таңбалары, қызмет көрсету таңбалары және тауар шығарылған жерлердің атаулары туралы заңдары осы Заңнан және Қазақстан Республикасының өзге де нормативтік құқықтық актерлерінен тұрады.

2. Егер Қазақстан Республикасы бекіткен халықаралық шартта осы Заңдағыдан өзге ережелер белгіленсе, халықаралық шарттың ережелері қолданылады.

3-бап. Уәкілетті мемлекеттік орган

Мемлекеттік патент ұйымы (бұдан әрі - Қазпатент) уәкілетті мемлекеттік орган болып табылады, ол осы Заңға сәйкес тауарлар таңбаларын және тауар шығарылған жерлердің атауларын қорғау саласында мемлекеттік монополияны қамтамасыз етеді, тауар таңбаларын тіркеуге, тауарлар шығарылған жер атауларын пайдалану құқығын тіркеуге және беруге өтінімдер қабылдайды, олар бойынша сараптама жүргізеді және куәліктер береді, тауар таңбаларын тіркеу туралы және тауарлар шығарылған жер атауларын пайдалану құқығын алу туралы мәліметтердің ресми жарияланымын жүзеге асырады және патент ведомствосының өзіне жүктелген өзге де міндеттерін орындайды.

2-тарау. Тауар таңбасын құқықтық қорғау және оны тіркеу шарттары

4-бап. Тауар таңбаларын құқықтық қорғау

1. Қазақстан Республикасында тауар таңбаларын құқықтық қорғау осы Заңда белгіленген тәртіпте оларды тіркеу негізінде, сондай-ақ Қазақстан Республикасының халықаралық шарттарына орай тіркеусіз беріледі.

2. Тауар таңбаларын құқықтық қорғау кәсіпкерлік қызметті жүзеге асыратын кез келген заңды тұлғаларға немесе жеке тұлғаларға берілуі мүмкін.

3. Тауар таңбасына құқық куәлікпен куәландырылады.

4. Тауар таңбасының иесі куәлікте көрсетілген тауарлар мен қызметтерге қатысты өзіне тиесілі тауар таңбасын пайдалану мен оған иелік етудің айрықша құқығына ие болады. Қазақстан Республикасында қорғалатын тауар таңбасын оның иесінің келісімінсіз ешкім де пайдалана алмайды.

5-бап. Тауар таңбасы ретінде тіркелетін белгілер

1. Тауар таңбасы ретінде бейнелеу, сөз, әріп, цифр, көлем белгілері және өзге де белгілер немесе бір тұлғалардың тауарлары мен қызметтерін басқа тұлғалардың біртектес тауарларынан немесе қызметтерінен ажыратуға мүмкіндік беретін олардың аралас үлгілері тіркелуі мүмкін.

2. Тауар таңбасы кез келген бояулы түсте немесе бояулы түстер үйлесімінде тіркелуі мүмкін.

6-бап. Тауар таңбасын тіркеуге жол бермейтін абсолюттік негіздер

1. Ажыратылатын реңкі жоқ белгілерден ғана тұратын, атап айтқанда:

1) тауарлардың белгілі бір түрін белгілеу үшін жалпыға ортақ қолданысқа енген;

2) жалпыға ортақ қабылданған рәміздер мен терминдер болып табылатын;

3) тауарлардың түрін, сапасын, санын, қасиетін, мақсатын, құндылығын, сондай-ақ олардың шығарылған немесе өткізілген жері мен уақытын көрсететін;

4) тіркеу талап етіліп отырған тауарлардың табиғи немесе нобайлық кескінделуін көрсететін;

5) бояулы түсті ғана бейнелейтін тауар таңбаларын тіркеуге жол берілмейді.

Көрсетілген белгілер тауар таңбасында басымдық жағдайда болмаса, оның қорғалмайтын элементтері ретінде пайдаланылуы мүмкін.

2. Мемлекеттік елтаңбаларды, тулар мен эмблемаларды, халықаралық ұйымдардың қысқартылған немесе толық атауларын, ресми бақылаулық, кепілдік және сынамалық таңбаларды, мөрлерді, олимпиадалық рәміздерді, наградаларды және басқа да айырым белгілерін, сондай-ақ араласып кеткен дәрежеге дейін оларға ұқсас белгілерді бейнелейтін белгілер тауар таңбалары ретінде тіркелмейді.

Егер бұған тиісті құзыретті органдардың немесе олардың иелерінің келісімі бар болса, мұндай белгілер қорғалмайтын элементтер ретінде пайдаланылуы мүмкін.

3. Тауар таңбалары немесе олардың элементтері ретінде:

1) тауарға немесе оның жасаушысына қатысты жалған болып табылатын немесе жаңылыстыруы мүмкін белгілерді, оның ішінде тауар шығарылған жерге қатысты жаңылыстыруы мүмкін географиялық көрсеткіштерді;

2) тауар шығарылған нақты жерді үстірт түрде көрсететін, бірақ тауар басқа аумақтан шығарылғаны туралы қате түсінік беретін;

3) минералды суларды, шараптарды немесе күшті спирт ішімдіктерін бірыңғайландыратын географиялық көрсеткіштер болып табылатын немесе оларды қамтитын белгілерді, осы жерден шығарылмаған сондай тауарларды белгілеу үшін, сондай-ақ егер аударма пайдаланылса немесе белгіде "түрінде", "үлгісінде", "стилінде" деген немесе басқа да осындай сөздер қоса жазылса, сол белгілерді;

4) өзінің мазмұны жөнінен қоғамдық мүдделерге, адамгершілік пен ізгілік принциптеріне қайшы келетін белгілерді тіркеуге жол берілмейді.

7-бап. Тауар таңбасын тіркеуден бас тартудың өзге де негіздері

1. Тауар таңбалары ретінде:

1) біртектес тауарлар мен қызметтер жөнінде басқа тұлғаның атына неғұрлым ертерек басымдықпен Қазақстан Республикасында тіркелген тауар таңбаларымен;

2) тауарлар мен қызметтердің кез келген түріне қатысты Қазақстан Республикасында жалпыға бірдей белгілі тауар таңбаларымен;

3) біртектес тауарлар мен қызметтерге (кері қайтарып алынғандарынан басқа) қатысты басқа тұлғаның атына неғұрлым ертерек басымдықпен Қазпатентке тіркеуге берілген белгілермен;

4) Қазақстан Республикасы аумағында белгіленген тәртіппен тіркелген сертификаттық таңбалармен;

5) тауар шығарылған жердің осы атауын пайдалану құқығы иесінің атына тіркелетін тауар таңбасының қорғалмайтын элементі ретінде олар енгізілуі мүмкін жағдайларды қоспағанда, Қазақстан Республикасында қорғалатын тауар шығарылған жер атауларымен олар араласып кеткен дәрежеге дейін бірдей немесе ұқсас белгілер тіркелуге жатпайды.

2. Тауар таңбалары ретінде:

1) олардың неғұрлым ертерек басымдығы болған жағдайда басқа тұлғалардың атындағы Қазақстан Республикасында қорғалатын өнеркәсіпті үлгілер;

2) біртектес тауарларға қатысты тауар таңбасына өтінімнің басымдық уақытына дейін осы атауларға құқық алған басқа тұлғаларға тиесілі Қазақстан Республикасы аумағында жалпыға бірдей белгілі фирмалық атаулар (немесе олардың бір бөлігі);

3) белгілі әдебиет, ғылым және өнер шығармаларының атаулары, авторлық құқықты бұза отырып алынған, өнер туындылары мен олардың фрагменттері;

4) осы адамдардың, олардың мұрагерлерінің немесе құқық мирасқорларының жеке мүліктік емес құқықтарын бұза отырып, олардың тектерін, есімдерін, бүркеншік аттарын және солардан таралатын есімдерді, портреттері мен факсимилелерін қайталайтын, сондай-ақ егер бұл белгілер Қазақстан Республикасы тарихы мен мәдениетінің игілігі болып табылса, олар тиісті құзыретті органның рұқсатынсыз тіркелмейді.

8-бап. Өтінім беру

1. Тауар таңбасын тіркеуге өтінімді Қазпатентке бір немесе бірнеше өтінім иелері береді.

2. Ұжымдық тауар таңбасын тіркеуге өтінім ұжымдық тауар таңбасын пайдалану туралы оған қатысушылардың келісіміне сәйкес бірлестік атынан беріледі.

9-бап. Тауар таңбасын тіркеуге берілетін өтінімге қойылатын талаптар

1. Өтінім бір тауар таңбасына қатысты болуға тиіс.

2. Өтінім бір үлгі бланкіде берілуге және:

1) белгіні тауар таңбасы ретінде тіркеу туралы, өтінім берушіні, сондай-ақ оның тұрғылықты жері немесе мекен-жайы көрсетілген өтінішті;

2) мәлімделген белгіні;

3) Тауарлар мен қызметтердің халықаралық сыныптамасына сәйкес тауар таңбасын тіркеу үшін өтініш жасалып отырған тауарлардың және (немесе) қызметтердің тізбесін қамтуға тиіс.

3. Өтінімге:

1) өтінім беру ақысы төленгенін растайтын құжат;

2) іс жүргізу өкіл арқылы жүзеге асырылған жағдайда сенімхат қоса тіркелуге тиіс.

4. Өтінім және оған қоса тіркелетін құжаттар мемлекеттік тілде немесе орыс тілінде табыс етіледі. Егер құжаттар басқа тілде табыс етілген болса, өтінім беруші

екі ай мерзімде олардың мемлекеттік тілдегі немесе орыс тіліндегі аудармасын тапсырады.

5. Өтінім берілген күн осы баптың 2-тармағының талаптарына сай өтінімнің Қазпатентке түскен күні бойынша белгіленеді.

6. Өтінім құжаттарына қойылатын талаптарды Қазпатент белгілейді.

10-бап. Тауар таңбасының басымдығы

1. Тауар таңбасының басымдығы Қазпатентке өтінімнің түскен күні бойынша белгіленеді.

2. Егер өтінім Қазпатентке аталған күннен бастап алты ай ішінде түссе, тауар таңбасының басымдығы (конвенциялық басымдық) Өнеркәсіптік меншікті қорғау жөніндегі Париж конвенциясына қатысушы елде, сондай-ақ онда көзделген халықаралық немесе аймақтық ұйымда тауар таңбасына бірінші өтінім берілген күн бойынша белгіленуі мүмкін. Конвенциялық басымдыққа өтініш жасалған кезде өтінім беруші алғашқы өтінім нөмірін, берілген күнін және ол берілген елді көрсетіп, алғашқы өтінімнің куәландырылған көшірмесін қоса тіркеуі қажет.

3. Ресми танылған халықаралық көрмелердің экспонаттарына орналастырылған тауар таңбасының басымдығы (көрмелік басымдық), егер өтінім Қазпатентке көрсетілген уақыттан бастап алты ай ішінде түссе, көрмеде экспонатты ашық көрсете бастаған күн бойынша белгіленуі мүмкін.

4. Конвенциялық немесе көрмелік басымдық құқығын пайдаланғысы келетін өтінім беруші мұны тауар таңбасына өтінім берген кезде немесе өтінім Қазпатентке түскен күннен бастап екі ай ішінде көрсетуге және осындай талаптың заңдылығын растайтын тиісті құжаттарды тапсыруға міндетті.

5. Өтінім бөлінген жағдайда өтінімдердің әрқайсысы бойынша басымдық алғашқы өтінімнің басымдық күні бойынша белгіленеді.

3-тарау. Тауар таңбасының сараптамасы

11-бап. Сараптаманы жүргізу тәртібі

1. Қазпатент өтінімдер сараптамасын кезең-кезеңмен жүргізеді:

1) алдын-ала сараптама - өтінім түскен күннен бастап екі ай ішінде жүргізіледі, оның барысында өтінімнің мазмұны, осы Заңның 5 және 9-баптарында белгіленген талаптарға сәйкес қажетті құжаттардың бар-жоғы тексеріледі;

2) толық сараптама - өтінім берілген күннен бастап он екі ай ішінде жүргізіледі, оның барысында мәлімделген белгінің осы Заңның 6 және 7-баптарында белгіленген талаптарға сәйкестігі тексеріледі.

2. Қазпатент сараптаманың кез келген кезеңінде қосымша материалдар сұратуға құқылы, олар өтінім иесіне сұрау салу жіберілген күннен бастап үш ай ішінде табыс етілуге тиіс.

Өтінім беруші қосымша материалдарды не көрсетілген мерзімді ұзарту туралы өтінішті белгіленген мерзімде табыс етпеген жағдайда іс жүргізу тоқтатылып, өтінім кері қайтарылып алынған болып есептеледі.

12-бап. Сараптама нәтижелері бойынша шешім

1. Алдын ала жасалған сараптама нәтижелері бойынша өтінім берушіге өтінімнің қарауға қабылданғаны, оған тиісті нөмір берілгені, берілген күні және басымдық күні белгіленгені туралы не өтінімді қарауға қабылдаудан бас тартылғаны туралы дәлелді

қорытынды түрінде хабарланады.

2. Толық сараптама нәтижелері бойынша Қазпатент тауар таңбасын тіркеу туралы немесе тіркеуден бас тарту туралы шешім қабылдайды. Тіркеу туралы шешім тауарлар мен қызметтердің бүкіл тізбесіне не олардың бір бөлігіне қатысты болуы мүмкін.

3. Тауар таңбасын тіркеу туралы сараптама шешімі оны Тауар таңбаларының мемлекеттік тізіліміне енгізгенге дейін неғұрлым ертерек басымдығы бар өтінімнің анықталуына байланысты қайта қаралуы мүмкін.

4. Өтінім иесі өзіне сараптама шешімі жіберілген күннен бастап үш ай мерзім ішінде шешімді қайта қарау туралы өтінішпен дәлелді қарсылық тапсыруға құқылы. Қарсылықты қарау нәтижелері бойынша тауар таңбасын тіркеу туралы шешім шығарылады не алғашқы шығарылған шешім толық немесе ішінара расталады.

5. Осы баптың 4-тармағына сәйкес шығарылған сараптама шешімімен келіспеген жағдайда өтінім беруші өзіне сараптама шешімі жіберілген күннен бастап оған үш ай ішінде Қазпатентке қарсылық бере алады. Қарсылық келіп түскен күннен бастап төрт ай ішінде оны апелляциялық кеңес қарауға тиіс.

13-бап. Өтінім берушінің құқықтары

Өтінім берушінің:

- 1) өтінімді сараптаманың кез келген кезеңінде кері қайтарып алуға;
- 2) өтінімге сараптама жасау барысында туындайтын мәселелерді қарауға қатысуға;
- 3) толық сараптама аяқталғанша өтінім материалдарын мәні бойынша өзгертпей, оларды толықтыруға, анықтауға немесе түзетуге;
- 4) сұрау салуға жауап беру немесе қарсылық білдіру үшін белгіленген мерзімді ұзарту, бірақ алты айдан аспайтын мерзімге ұзарту туралы өтініш беруге;
- 5) өткізіп алынған мерзімді қалпына келтіру туралы, бірақ өткізіп алынған мерзім аяқталған күннен екі айдан кешіктірмей қалпына келтіру туралы өтініш беруге;
- 6) қарсы қойылған материалдармен танысуға құқығы бар.

4-тарау. Тауар таңбасын тіркеу

14-бап. Тауар таңбаларының мемлекеттік тізілімі

1. Тауар таңбаларын тіркеу Тауар таңбаларының мемлекеттік тізілімінде жүргізіледі.

2. Тауар таңбаларының мемлекеттік тізіліміне:

- 1) тауар таңбасының бейнесі;
 - 2) оның иелері туралы мәліметтер;
 - 3) тауар таңбасын тіркеудің нөмірі мен күні;
 - 4) тауар таңбасы тіркелген тауарлар мен қызметтердің тізбесі;
 - 5) Қазпатентке берілген өтінімнің нөмірі мен күні;
 - 6) егер конвенциялық басымдық белгіленген болса, алғашқы өтінім берілген ел, оның нөмірі және берілген күні;
 - 7) тауар таңбасын тіркеуге қатысты басқа да мәліметтер енгізіледі.
3. Тауар таңбаларының мемлекеттік тізілімі жалпыға ортақ болып табылады. Мүдделі тұлғалардың өтініші бойынша Қазпатент Тауар таңбаларының мемлекеттік тізілімінен көшірме береді.

4. Тауар таңбасының иесі тіркеуге қатысты өзгерістер туралы Қазпатентке хабарлап отыруға міндетті.

15-бап. Тіркеудің қолданылу мерзімі

1. Тауар таңбасының тіркелуі өтінім берілген күннен бастап он жыл бойы қолданылады.

2. Тауар таңбасын тіркеудің қолданылу мерзімі оның қолданылуының соңғы жылы ішінде берілген иесінің өтініші бойынша әр жолы он жылға ұзартылып отырылуы мүмкін. Тіркеудің қолданылу мерзімінің ұзартылуы туралы мәліметтер Тауар таңбаларының мемлекеттік тізіліміне және куәлікке енгізіледі.

3. Осы баптың 2-тармағында көрсетілген өтініш беру мерзімі тіркеудің қолданылу мерзімі аяқталған соң алты ай ішінде берілген иесінің арызы бойынша қалпына келтірілуі мүмкін.

16-бап. Тіркеу туралы мәліметтерді жариялау

Тауар таңбаларының мемлекеттік тізіліміне енгізілген тауар таңбасын тіркеуге қатысты мәліметтерді, сондай-ақ тіркеуге қатысты бұдан былайғы өзгерістерді Тауар таңбаларының мемлекеттік тізіліміне тікелей жазылған соң Қазпатент бюллетеньде жариялайды.

17-бап. Тауар таңбасын қайта тіркеу шарттары

Тіркелуінің қолданылу мерзімі өтіп кеткен тауар таңбасы тіркеудің қолданылуы тоқтатылған күннен бастап үш жыл бойы бұрынғы иесінен басқа тұлғаның атына қайта тіркелмейді.

Осы шарт тауар таңбасының иесі тіркеудің қолданылу мерзімі аяқталғанға дейін бас тартқан жағдайда да қолданылады.

18-бап. Тауар таңбасына берілетін куәлік

1. Осы Заңға сәйкес тіркелген тауар таңбасына белгіленген үлгідегі куәлік беріледі.

2. Тауар таңбасына берілген куәлік тауар таңбасының тіркелу фактісін, оның басымдығын, куәлікте көрсетілген тауарлар мен қызметтерге қатысты тауар таңбасына иесінің айырықша құқығын куәландырады.

3. Куәліктің нысанын Қазпатент белгілейді.

5-тарау. Тауар таңбасын пайдалану

19-бап. Тауар таңбасын пайдалану шарттары

1. Тауар таңбасының иесі тауар таңбасын пайдалануға міндетті.

2. Делдалдық қызметті жүзеге асыратын кәсіпкерлер тауар жасаушы келісім берген жағдайда өз таңбасын олар өткізетін тауарларда тауар жасаушының тауар таңбасымен қатар пайдалануға, сондай-ақ оны жасаушының тауар таңбасының орнына қоюға құқылы.

3. Ұжымдық тауар таңбасының иелері ұжымдық тауар таңбасымен қатар өздері шығаратын тауарларда өз тауар таңбаларын пайдалана алады.

4. Кез келген мүдделі тұлға тіркелген күннен бастап бес жыл немесе қарсылық білдірудің алдындағы бес жыл бойы мүлдем пайдаланылмауына байланысты тауар таңбасын тіркеудің қолданылуына қарсы Қазпатентке қарсылық білдіре алады. Қарсылық куәлікте

көрсетілген барлық тауарларға немесе олардың бір бөлігіне қатысты болуы мүмкін және оны апелляциялық кеңес, түскен күннен бастап алты ай ішінде қарауға тиіс.

Тауар таңбасын пайдаланудың дәлелі болып оның тіркелуіне себеп болған тауарларда және (немесе) олардың бумасында қолданылуы есептеледі. Тауар таңбасын жарнамада, баспа басылымдарында, ресми бланкілерде, маңдайшаларда немесе Қазақстан Республикасында өткізілетін көрмелерде тауарлардың көрсетілуі кезінде қолдану оның пайдаланылғаны болып танылуы мүмкін.

Тауар таңбасының пайдаланылмауына байланысты оның қолданылуын тоқтату туралы мәселені шешу кезінде тауар таңбасы өзіне қатысты емес жағдайларға байланысты пайдаланылмағаны жөнінде иесі ұсынған дәлелдемелер назарға алынады.

5. Тіркелген тауар шығарылған жердің атауымен араласып кеткен дәрежеге дейін бірдей немесе ұқсас тауар таңбасын тауар шығарылған жердің атауын тіркеу күніне дейін кемінде алты айға дейін риясыз пайдалана бастаған тұлғалар оны кейіннен Қазпатент белгілейтін мерзім шегінде, бірақ аталған тіркеу күнін есептегенде, кемінде жеті жыл пайдалану құқығын сақтайды. Тауар таңбасы пайдаланылмаған немесе тауар шығарылған жердің атауы тіркелген күнге дейін алты айдан аз уақыт пайдаланылған кезде тауар таңбасының қолданылуы мерзімінен бұрын тоқтатылады.

20-бап. Ескертпе таңбалау

Тауар таңбасына куәлік иесі тауар таңбасына қатар тұстан пайдаланылып отырған белгі Қазақстан Республикасында тіркелген тауар таңбасы екенін көрсететін латынның (R) әрпі түріндегі ескертпе таңбалауын не "тауар таңбасы", "товарный знак" немесе "тіркелген тауар таңбасы" деген сөз белгілерін соға алады.

21-бап. Тауар таңбасына құқықты беру

1. Куәлікте көрсетілген барлық тауарлар мен қызметтерге не олардың бір бөлігіне қатысты тауар таңбасына берілген ерекше құқықты оның иесі басқа тұлғаға шарт бойынша беруі мүмкін.

Егер ол тауарға немесе оның жасаушысына қатысты жаңылыстыруға себепші болатын болса, тауар таңбасына құқықты беруге жол берілмейді.

Тауар таңбасына құқықтың ауысуы, оның ішінде оны шарт бойынша немесе құқық мирасқорлығы тәртібімен беру Қазпатентте тіркелуге тиіс.

2. Тауар таңбасын пайдалану құқығын тауар таңбасының иесі (лицензиар) басқа тұлғаға (лицензиатқа) куәлікте көрсетілген барлық тауарлар мен қызметтерге не олардың бір бөлігіне қатысты лицензиялық шарт бойынша беруі мүмкін.

Лицензиатқа тауар таңбасын пайдалануға рұқсат беретін лицензиялық шарт тауарлардың немесе қызметтердің сапасы лицензиар тауарлары мен қызметтерінің сапасынан төмен болмайтыны және лицензиардың осы ереженің орындалуына бақылау жасауға құқығы бар екені туралы ережені қамтуға тиіс.

Тауар таңбасына құқықтың күші тоқтатылғанда, лицензиялық шарттың қолданылуы тоқтатылады.

Тауар таңбасына құқықтың басқа тұлғаға ауысуы лицензиялық шартты тоқтатуға әкеп соқпайды.

3. Тауар таңбасына құқықты беру туралы шарт немесе лицензиялық шарт жазбаша түрде жасалып, Қазпатентте тіркелуге тиіс. Тіркеу туралы жазбаша нысан мен талаптарды сақтамау шарттың жарамсыздығына әкеп соғады.

22-бап. Заңды тұлғаны бөлу түрінде қайта ұйымдастыру кезінде тауар таңбасына құқықты беру

Заңды тұлға бөлінген кезде тауар таңбасына құқық тауарлар өндіру немесе қызметтер көрсету қолына көшкен жаңадан пайда болған заңды тұлғаға беріледі.

Тауар таңбасының тіркелуіне себеп болған тауарлар өндірудің немесе қызметтер көрсетудің бір бөлігі жаңадан пайда болған заңды тұлғалардың әрқайсысында сақталып қалған жағдайда, жаңа заңды тұлғалар, олардың келісімі болған жағдайда, тауар таңбасының тең иеленушісі болып табылады.

6-тарау. Тауар таңбасын тіркеудің қолданылуын тоқтату

23-бап. Тауар таңбасын тіркеуге дау айту

1. Тауар таңбасын тіркеуге, егер ол осы Заңның 7-бабының 1-тармағының 1)-3) тармақшаларын қоспағанда, 6 және 7-баптарда белгіленген талаптарды бұза отырып жүзеге асырылса, бүкіл қолданылу мерзімі бойы немесе егер ол осы Заңның 7-бабының 1-тармағының 1)-3) тармақшаларында белгіленген талаптарды бұза отырып жүзеге асырылса, тауар таңбасы тіркелген күннен бастап бес жыл ішінде дау айтылып, ол толық немесе ішінара жарамсыз деп танылуы мүмкін.

2. Кез келген мүдделі тұлға осы баптың 1-тармағында көрсетілген негіздер бойынша тауар таңбасының тіркелуіне қарсы Қазпатентке қарсылық бере алады.

Тауар таңбасының тіркелуіне қарсы қарсылықты ол түскен күннен бастап алты ай ішінде апелляциялық кеңес қарауға тиіс. Қарсылық беруші тұлғаның, сондай-ақ тауар таңбасы иесінің даудың қаралуына қатысуға құқығы бар.

24-бап. Тауар таңбасының тіркелуін қолдануды тоқтату және оны жарамсыз деп тану

1. Тауар таңбасының тіркелуін қолдану:

1) осы Заңның 15-бабында көзделген оның қолданылу мерзімінің аяқталуына байланысты;

2) заңды тұлғаның таратылуына немесе жеке тұлғаның - тауар таңбасы иесінің кәсіпкерлік қызметінің тоқтатылуына байланысты;

3) тауар таңбасы иесінің одан бас тартуы туралы берген жазбаша арызы негізінде;

4) осы Заңның 19-бабының 4-тармағына сәйкес тауар таңбасы пайдаланылмаған жағдайда;

5) араласып кеткен дәрежеге дейін бірдей немесе ұқсас тауар шығарылған жер атауы осы Заңның 19-бабының 5-тармағына сәйкес тіркелген жағдайда тоқтатылады.

2. Осы Заңның 23-бабының 1-тармағында көрсетілген негіздер бойынша апелляциялық кеңестің немесе соттың шешімімен, тауар таңбасының тіркелуі толық немесе ішінара жарамсыз деп танылады.

3. Қазпатент Тауар таңбаларының мемлекеттік тізіліміне тауар таңбасын тіркеудің қолданылуы тоқтатылуына немесе оның, жарамсыз деп танылуына байланысты оның күшін жою туралы жазба енгізеді.

7-тарау. Тауарлар шығарылған жер атауларын құқықтық қорғау және оларды тіркеу шарттары

25-бап. Тауарлар шығарылған жерлердің атауларын құқықтық қорғау

1. Қазақстан Республикасында тауар шығарылған жерлердің атауларын құқықтық қорғау осы Заңда көзделген тәртіппен, сондай-ақ Қазақстан Республикасының халықаралық шарттарына орай оларды тіркеу негізінде беріледі.

2. Тауар шығарылған жер атауын пайдаланудың ерекше құқығы айрықша қасиеттері тек қана немесе негізінен табиғи жағдайларды және (немесе) адам факторларын қоса алғанда, географиялық ортаға байланысты осы географиялық объектіде кәсіпкерлік қызметпен айналысатын, тауарлар өндіретін бір немесе бірнеше заңды немесе жеке тұлғаларға берілуі мүмкін.

26-бап. Тауарлар шығарылған жерлердің атаулары ретінде тіркелетін белгілер

Тауарлар шығарылған жерлердің атаулары ретінде тарихи атауларын қоса алғанда, елдердің, елді мекендердің, жерлердің атаулары, сондай-ақ басқа да географиялық объектілердің атаулары немесе олардың тауарларының көрініс атауларымен ұштасымы тіркелуі мүмкін.

27-бап. Тауарлар шығарылған жерлердің атаулары ретінде тіркелмейтін белгілер

Тауарлар шығарылған жерлердің атаулары ретінде:

- 1) тауар шығарылған жерге қатысты жаңылысуға әкеп соқтыратындай географиялық көрсеткіштер болып табылатын;
- 2) тауар өндірілген нақты жерді үстірт түрде көрсететін, бірақ тауардың басқа аумақтан шығарылғаны жөнінде қате түсінік беретін белгілер;
- 3) тауар жасалған жермен байланысты емес және Қазақстан Республикасында белгілі түрдегі тауарлар белгісі ретінде жалпыға ортақ қолданысқа енген белгілер тіркелмейді.

28-бап. Өтінім беру

Өтінім беруші тауар шығарылған жер атауын тіркеуге және тауар шығарылған жер атауын пайдалану құқығын беруге өтінімді (бұдан әрі - өтінім) Қазпатентке береді.

29-бап. Өтінімге қойылатын талаптар

1. Өтінім тауар шығарылған жердің бір атауына қатысты болуға тиіс.
2. Өтінім бір үлгі бланкіде берілуге және:
 - 1) өтінім иесі, сондай-ақ оның тұрғылықты жері немесе мекен-жайы көрсетілген, тауар шығарылған жердің атауын пайдалану құқығын тіркеу және (немесе) беру туралы өтінішті;
 - 2) мәлімделген белгіні;
 - 3) тауардың түрін;

4) тауардың айрықша қасиеттерінің сипаттамасын;
5) тауар өндірілген жердің нұсқамасын (географиялық объектінің шекарасы) қамтуға тиіс.

3. Өтінімге:

1) өтінім беру ақысы төленгенін растайтын құжат;
2) құзыретті органның өтінім берушінің аталған географиялық объектіде тұрып жатқаны және ерекше қасиеттері сол географиялық объектіге тән табиғи жағдайлармен және (немесе) адам факторларымен байланысты тауар шығаратыны туралы қорытындысы;
3) мәлімделген тауар шығарылған жер атауын тауар шығарылған елде пайдалану жөніндегі шетелдік өтінім берушінің құқығын растайтын құжат;
4) іс жүргізу өкіл арқылы жүргізілген жағдайда сенімхат қоса тіркелуге тиіс.
4. Өтінім мен оған қоса тіркелетін құжаттар мемлекеттік тілде немесе орыс тілінде тапсырылады. Егер құжаттар басқа тілде тапсырылса, онда өтінім беруші екі ай ішінде олардың мемлекеттік тілдегі немесе орыс тіліндегі аудармасын тапсыруға тиіс.

8-тарау. Тауар шығарылған жер атауына сараптама

30-бап. Сараптама жүргізу тәртібі

1. Өтінім берілген күннен бастап алты ай ішінде Қазпатент сараптама жүргізеді, оның барысында оның осы Заңның 26, 27 және 29-баптарында белгіленген талаптарға сәйкестігі тексеріледі.

2. Сараптама барысында Қазпатент қосымша материалда сұратуға құқылы, олар өтініш берушіге сұрау жіберілген күннен бастап үш ай ішінде тапсырылуға тиіс.

Қосымша материалдарды не осы мерзімді ұзарту туралы өтінішті өтінім беруші белгіленген мерзімде тапсырмаған жағдайда іс жүргізу тоқтатылып, өтінім кері қайтарып алынған болып есептеледі.

31-бап. Сараптама нәтижелері бойынша шешімдер

1. Сараптама нәтижелері бойынша Қазпатент:

1) өтінімді тиісті нөмір беріп, қарауға қабылдау не қарауға қабылдаудан бас тарту туралы дәлелді қорытынды түрінде;

2) тауар шығарылған жер атауын тіркеу және (немесе) тауар шығарылған жер атауын пайдалану құқығын беру туралы;

3) тауар шығарылған жер атауын тіркеуден және (немесе) тауар шығарылған жер атауын пайдалану құқығын беруден бас тарту туралы тиісті шешім қабылдайды.

2. Өтінім беруші өзіне тіркеуден бас тарту туралы шешім жіберілген күннен бастап үш ай мерзімде сараптама шешімін қайта қарау туралы өтініш білдіріп, дәлелді қарсылық тапсыруға құқылы.

Қайта шығарылған сараптама шешімімен келіспеген жағдайда өтінім беруші осы Заңның 12-бабының 5-тармағында көзделген тәртіппен қарсылық бере алады.

32-бап. Өтінім берушінің құқықтары

Тауар шығарылған жер атауына сараптама жүргізілген кезде өтінім берушіге осы Заңның 13-бабында көрсетілген құқықтар беріледі.

9-тарау. Тауар шығарылған жер атауын пайдалану құқығын тіркеу және беру

33-бап. Тауарлар шығарылған жерлердің атауларының мемлекеттік тізілімін жүргізу тәртібі

1. Тауар шығарылған жер атауын тіркеу және тауар шығарылған жер атауын пайдалану құқығын беру сараптама шешімінің негізінде Тауарлар шығарылған жерлердің атауларының мемлекеттік тізілімінде жүргізіледі.

2. Тауарлар шығарылған жерлердің атауларының мемлекеттік тізіліміне тауар шығарылған жердің атауы, тіркелу нөмірі мен күні, тауардың айрықша қасиеттерінің сипаттамасы, тұрған жерлері көрсетіле отырып, тауар шығарылған жер атауын пайдалану құқығының барлық иелері туралы мәліметтер, өтінімнің нөмірі мен берілген күні және аталған мәліметтердегі барлық бұдан былайғы өзгерістер, сондай-ақ тіркеуге қатысты басқа да мәліметтер енгізіледі.

3. Тауар шығарылған жер атауын пайдалану құқығының иесі тіркеу туралы мәліметтерге қатысты өзгерістер жайында Қазпатентке хабарлап отыруға міндетті. Өзгерістер туралы жазбаны Қазпатент Тауарлар шығарылған жерлердің атауларының мемлекеттік тізіліміне және куәлікке түсіреді.

4. Мүдделі тұлғалардың өтініштері бойынша Қазпатент Тауар шығарылған жерлердің атауларының мемлекеттік тізілімінен көшірме береді.

34-бап. Тауар шығарылған жер атауын тіркеудің және тауар шығарылған жер атауын пайдалану құқығының қолданылу мерзімдері

1. Аталған географиялық объект аумағында өндірілетін тауардың ерекше қасиеттері сақталған жағдайда тауар шығарылған жер атауларын тіркеу мерзімсіз қолданылады.

2. Тауар шығарылған жер атауын пайдалану құқығы Қазпатентке өтінім берілген күннен бастап он жыл бойы қолданылады.

3. Тауар шығарылған жер атауын пайдалану құқығының қолданылу мерзімі тауар шығарылған жер атауының тіркелуіне қатысты тауардың ерекше қасиеттері сақталған жағдайда оның қолданылуының соңғы жылында берілген иесінің өтініші бойынша әр жолы он жыл ұзартылып отырады.

4. Тауар шығарылған жер атауын пайдалану құқығының қолданылу мерзімін ұзарту туралы өтініш осы Заңның 29-бабына сәйкес құзыретті органның қорытындысымен бір мезгілде тапсырылады. Тіркеудің қолданылу мерзімін ұзарту туралы мәліметтер Тауарлар шығарылған жерлердің атауларының мемлекеттік тізіліміне және куәлікке енгізіледі.

5. Осы баптың 3-тармағында белгіленген өтінім беру мерзімі тіркеудің қолданылу мерзімі аяқталған соң алты айдың ішінде берілген иесінің арызы бойынша қалпына келтіріледі.

35-бап. Тіркеу туралы мәліметтерді жариялау

Тауар шығарылған жер атауын тіркеуге және тауар шығарылған жер атауын пайдалану құқығын беруге қатысты мәліметтерді, сондай-ақ бұдан былайғы өзгерістерді Тауарлар шығарылған жерлердің атауларының мемлекеттік тізіліміне тікелей жазылған соң Қазпатент бюллетенінде жариялайды.

36-бап. Тауар шығарылған жер атауын пайдалану құқығына берілетін куәлік

1. Осы Заңға сәйкес тіркелген тауар шығарылған жер атауына белгіленген үлгідегі куәлік беріледі.
2. Куәлік тауар шығарылған жер атауының тіркелу фактісін және куәлікте көрсетілген тауар иесінің осы тауарды пайдалану жөніндегі айрықша құқығын куәландырады.
3. Куәліктің нысанын Қазпатент белгілейді.

10-тарау. Тауар шығарылған жер атауын пайдалану

37-бап. Тауар шығарылған жер атауын пайдалану шарттары

1. Тауар шығарылған жер атауын пайдалану құқығының иесіне оны пайдаланудың айрықша құқығы беріледі.
2. Тіркелген тауар шығарылған жер атауымен бірдей немесе араласып кету дәрежесіне дейін ұқсас географиялық көрсеткішті тіркемей, оны біртектес тауарларға қатысты пайдалануға жол берілмейді.
3. Минералды суларды, шараптарды немесе күшті спирт ішімдіктерін бірыңғайландыратын географиялық көрсеткіштер болып табылатын немесе соларды қамтитын тауарлар шығарылған жерлердің атауларын, егер бұл орайда тауар шығарылған нақты жер көрсетілсе не аударма пайдаланылса немесе белгіде "түрінде", "үлгісінде", "стилінде" деген немесе басқа да осындай сөздер қоса жазылса, осы жерден шығарылмаған осындай тауарларды белгілеу үшін пайдалануға жол берілмейді.
4. Тауар шығарылған жер атауын пайдалану құқығын иеліктен айыру, оны біреуге беру туралы өзге де мәмілелер және лицензиялық шарт негізінде тауар шығарылған жер атауын пайдалану құқығын беруге жол берілмейді.

38-бап. Ескертпе таңбалау

Тауар шығарылған жер атауын пайдалану құқығының иесі тауар шығарылған жер атауымен қатар тұстан латынның (R) әрпі түріндегі ескертпе таңбалауды, "тіркелген тауар шығарылған жердің атауы", "зарегистрированное наименование места происхождения товара" немесе "ТШЖА тірк." деген сөз белгілерін соға алады.

11-тарау. Тауар шығарылған жер атауын құқықтық қорғаудың қолданылуын тоқтату

39-бап. Тауар шығарылған жер атауының тіркелуіне және (немесе) тауар шығарылған жер атауын пайдалану құқығының берілуіне дау айту

1. Егер тауар шығарылған жер атауын тіркеу және (немесе) тауар шығарылған жер атауын пайдалану құқығын беру осы Заңның 26, 27 және 29-баптарында белгіленген талаптарды бұза отырып жүзеге асырылған болса, оған дау айтылып, ол жарамсыз деп танылуы мүмкін.
2. Кез келген мүдделі тұлға тауар шығарылған жер атауының тіркелуіне және

(немесе) тауар шығарылған жер атауын пайдалану құқығының берілуіне қарсы Қазпатентке осы баптың 1-тармағында көрсетілген негіз бойынша қарсылық бере алады.

Наразылық осы Заңның 23-бабының 2-тармағында белгіленген тәртіппен және мерзімде қаралуға тиіс.

**40-бап. Тауар шығарылған жер атауының тіркелуін
және тауар шығарылған жер атауын пайдалану
құқығының қолданылуын тоқтату және оларды
жарамсыз деп тану**

1. Тауар шығарылған жер атауын тіркеу:

1) осы географиялық объектіге тән жағдайлардың жойылуына және Тауарлар шығарылған жерлердің атауларының мемлекеттік тізілімінде осы тауар шығарылған жер атауы жөнінде көрсетілген қасиеттері бар тауар өндірудің мүмкін болмауына байланысты;

2) тауар шығарылған жер атауын құқықтық қорғаудың шығарылатын елде тоқтатылуына байланысты доғарылады.

2. Тауар шығарылған жер атауын пайдалану құқығының қолданылуы:

1) осы Заңның 34-бабында белгіленген оның қолданылу мерзімінің аяқталуына байланысты;

2) осы тауар шығарылған жер атауына қатысты Тауарлар шығарылған жерлердің атауларының мемлекеттік тізілімінде көрсетілген айырықша қасиеттерді тауардың жоғалтуына байланысты;

3) тауар шығарылған жер атауын пайдалану құқығы иесінің Қазпатентке берген өтініші негізінде;

4) заңды тұлға таратылған немесе жеке тұлға - тауар шығарылған жер атауын пайдалану құқығы иесінің кәсіпкерлік қызметі тоқтатылған кезде доғарылады.

3. Тауар шығарылған жер атауын тіркеу және (немесе) тауар шығарылған жер атауын пайдалану құқығын беру осы Заңның 39-бабының 1-тармағында көрсетілген негіздер бойынша апелляциялық кеңестің немесе соттың шешімі бойынша жарамсыз деп танылады.

4. Тауар шығарылған жер атауын тіркеу және (немесе) тауар шығарылған жер атауын пайдалану құқығы қолданылуын тоқтатқан немесе олар жарамсыз деп танылған кезде Қазпатент Тауарлар шығарылған жерлердің атауларының мемлекеттік тізіліміне оларды жою туралы жазба енгізеді.

**12-тарау. Тауар таңбаларын иелерінің құқықтарын
және тауарлар шығарылатын жерлердің
атауларын пайдалану құқықтарын қорғау**

41-бап. Апелляциялық кеңес

1. Апелляциялық кеңес осы Заңның 12-бабының 5-тармағына, 19-бабының 4-тармағына, 23-бабының 2-тармағына, 39-бабының 2-тармағына сәйкес берілетін қарсылықтар бойынша дауларды сотқа дейін қарау жөніндегі Қазпатенттің бөлімшесі болып табылады. Апелляциялық кеңес туралы ережені, Апелляциялық кеңеске қарсылықтар беру және қарау ережелерін Қазпатент белгілейді.

2. Берілген қарсылық апелляциялық кеңестің алқа мәжілісінде осы Заңмен белгіленген мерзімде қаралуға тиіс. Қарсылықты қарау мерзімі қарсылық беруші тұлғаның, тауар таңбасы немесе тауар шығарылған жер атауын пайдалану құқығы иесінің арызы бойынша ұзартылуы мүмкін, бірақ ол қарсылықты қарау үшін белгіленген мерзім

өткен күннен бастап алты айдан аспауға тиіс.

3. Қарсылық беруші тұлға, тауар таңбасының немесе тауар шығарылған жер атауының иесі шешімді алған күннен бастап алты ай ішінде апелляциялық кеңестің шешіміне сотқа шағымдануға құқылы.

42-бап. Дауларды қарау

1. Сот тәртібімен қарауға:
 - 1) куәлік берудің заңдылығы туралы;
 - 2) тауар таңбасы немесе тауар шығарылған жер атауын пайдалану құқығы иесінің айрықша құқығын бұзу туралы;
 - 3) тауар таңбасын пайдалануға лицензиялық шарттар жасасу және оларды орындау туралы;
 - 4) куәліктен туындайтын құқықтарды қорғауға байланысты басқа да даулар жатады.
2. Қазпатент сот шешімі негізінде тіркеуге қатысты өзгерістер туралы мәліметтерді жариялайды.

43-бап. Заңды және жеке тұлғалардың тауар таңбалары және тауарлар шығарылған жерлердің атаулары туралы заңдарды бұзғаны үшін жауапкершілігі

1. Тауар таңбасын немесе тауар шығарылған жер атауын немесе араласып кеткен дәрежеге дейін олармен ұқсас белгілерді біртектес тауарлар мен қызметтерге қатысты азаматтық айналымға рұқсатсыз енгізу тауар таңбасының немесе тауар шығарылған жер атауын пайдалану құқығы иесінің айрықша құқығын бұзу болып танылады.
2. Қорғалатын тауар таңбасын немесе тауар шығарылған жер атауын, сондай-ақ араласып кеткен дәрежеге дейін олармен ұқсас белгілерді осы Заңның талаптарын бұза отырып біртектес тауарларға пайдаланғаны үшін кінәлі тұлғалар Қазақстан Республикасының заңдарына сәйкес жауапты болады.

44-бап. Тауар таңбасы иелерінің құқығын немесе тауар шығарылған жер атауын пайдалану құқығын бұзған тұлғалардың міндеттері

- Тауар таңбасын немесе тауар шығарылған жер атауын не араласып кеткен дәрежеге дейін онымен ұқсас белгіні заңсыз пайдаланған тұлға:
- 1) жолсыздықты тоқтатуға және тауар таңбасының немесе тауар шығарылған жер атауын пайдалану құқығы иесіне ол шеккен залалдың орнын толтыруға;
 - 2) дайындалған тауар таңбасының немесе тауар шығарылған жер атауының кескінін жоюға, тауардан, оның бумасынан, бланкілерден немесе басқа құжаттамадан заңсыз пайдаланылатын тауар таңбасын немесе тауар шығарылған жер атауын, сондай-ақ араласып кеткен дәрежеге дейін олармен ұқсас белгіні алып тастауға міндетті. Осы талапты орындау мүмкін болмаған кезде тиісті тауар Қазақстан Республикасының заңдарында белгіленген тәртіппен жойып жіберілуге тиіс.

13-тарау. Қорытынды ережелер

45-бап. Қазпатенттің іс-әрекетіне ақы төлеу

Тауар таңбасын тіркеуге өтінімдер, тауар шығарылған жер атауын пайдалану құқығын тіркеуге және беруге өтінімдер қабылдауды, сараптама жүргізуді, куәліктер беруді және оларға қатысушылар үшін құқықтар мен міндеттер жүктейтін өзге де іс-әрекеттерді қамтитын осы Заңда көзделген іс-әрекеттерді жүзеге асырғаны үшін Қазпатент заңдарға сәйкес ақы алады.

46-бап. Патенттік сенімді өкілдер

1. Біліктілік деңгейі қойылатын талаптарға сәйкес келетін Қазақстан Республикасының аумағында тұрақты тұратын оның азаматы патенттік сенімді өкіл бола алады. Патенттік сенімді өкілдерге біліктілік талаптарын, оларды аттестаттаудан және тіркеуден өткізу тәртібін Қазпатент белгілейді.

2. Қазақстан Республикасынан тыс жерлерде тұратын жеке тұлғалар немесе шетелдік заңды тұлғалар Қазпатентте тіркелген патенттік сенімді өкілдері арқылы тауар таңбаларын және тауарлар шығарылған жерлердің атауларын тіркеуге байланысты істер жүргізеді, апелляциялық кеңеске қарсылықтар береді және оны қарауға қатысады.

Қазақстан Республикасында тұрақты тұратын, бірақ уақытша одан тыс жерлерде жүрген жеке тұлғалар тауар таңбаларын және тауарлар шығарылған жерлердің атауларын тіркеуге байланысты істерді Қазақстан Республикасы шегінде хат-хабарлар алысуға арналған мекен-жайларын көрсетіп, патенттік сенімді өкілдерсіз жүргізе алады.

3. Патенттік сенімді өкілдің өкілеттігі сенімхатпен куәландырылады.

47-бап. Шет елдерде тіркеу

1. Қазақстан Республикасының заңды және жеке тұлғалары тауар таңбасын шет елдерде тіркеуге немесе оны халықаралық тіркеуден өткізуге құқылы.

Тауар таңбасын халықаралық тіркеуден өткізуге өтінім Қазпатент арқылы беріледі.

2. Тауар шығарылған жер атауын шет елдерде тіркеу ол Қазақстан Республикасында тіркеліп, осы тауар шығарылған жер атауын пайдалану құқығы алынғаннан кейін жүргізіледі.

48-бап. Шетелдіктердің, шетелдік заңды тұлғалардың және азаматтығы жоқ адамдардың құқықтары

Егер Қазақстан Республикасының заң актілерінде өзгеше көзделмесе, шетелдіктер, шетелдік заңды тұлғалар, азаматтығы жоқ адамдар осы Заңда көзделген құқықтар мен міндеттерді Қазақстан Республикасының заңды және жеке тұлғаларымен бірдей пайдаланады және атқарады.

*Қазақстан Республикасының
Президенті*